

Melodie:  
Another One Bites the Dust

### Flitzer im Zug

D Güntensperger Monika  
gaht hüt Abig mal furt.  
Sie isch im Zug fürs Seenachtsfäscht  
doch fühlt sich ächli blutt.  
Sie merkt: «Öppis han ich vergässe.  
Ich chan so nöd umelaufel!»  
Jetzt muss sie halt in Manor gah,  
als erschts go en BH chaufe!

### Chlapf im Schlipf

De Patrick Luib isch das Jahr  
au a de Linthbiitsch gsi.  
Er isch en bequeme Maa,  
hät s Auto mit debii.  
Am Mäntigmorge merkt er schnäll,  
er hets früehner selle raffe:  
Sis Auto, das steht no z Dorf,  
so chan er nöd go schaffä.

### Z Schänis bisch überall dihei

De Keks hät nach em SchmuDo  
en Bäre hunger gha.  
Bevor er in Tschirky gaht,  
mues er in Kiosk gah.  
Stundä spöter wacht er denn uf  
und Hunger hät er no.  
Er liit uf de Kiosk-Couch.  
Bim Postnä hät's en gno.


### Augen auf bei der Car-Wahl

Jodlerclub und Männerchor  
hend am gliche Tag Programm.  
De Grobe Paul, de gseht en Car.  
Er stüigt i ohni Tamtam.  
Nach churzer Fahrt merkt ers äfäng.  
Es wird ihm öppis klar:  
Das isch ja gar nöd min Verein.  
Ich sitz im falsche Car!

### Grosse Start is neue Jahr

Fürd Silvesterparty  
isch au d Migi z Schänis gsi.  
Es Taxi brucht sie zum Heigah.  
De Eberhard wählt sie.  
Für zwölf Persone bstellt sie eis,  
das klappet wunderbar.  
Sie traht denn ihne Auge nöd,  
es chunnt en riese Car.

Verkehrshöll Schänis  
Melodie: Heaven



Zeig mir de Wäg dur Schänis.  
Ich chum nöd vorwärts, d Situation isch ganz miis.  
Han gmeint, ich seg da ufem Land.  
D Strassenarbetä sind ja scho allerhand.

Wettsch durs Dorf fahrä, da stahsch immer im Stau.  
D Amplä sind rot und du bischs langsam au.  
Und im Fuchswinkel ä neu Situation:  
Chunnsch nöd durä wäg de Neusignalisation.

Oh zeig mir de Wäg dur Schänis.  
A jedem Eggä bliib ich stah.  
Ich bin wie gfange i dem Dorf dri.  
Doch s isch mer glich, well ich gern z Schänis bi.

Und wettsch du uf Ziegelbrugg,  
fahrsch ine Sackgass und du muesch wieder zugg.  
Bim Hirzliblick da stahsch nomal ah:  
S Militär hät dett en Panzer ligge lah.

Au idä Urteile, da chunnsch nöd verbii.  
Es Loch zmizt idä Strass! Muess das denn sii?  
Und bim Gallusturm versperrt d Wiehnachtscherzä d Sicht.  
Wieso verlürt sie das Jahr nöd s Glichgewicht?

Oh zeig mir de Wäg dur Schänis.  
A jedem Eggä bliib ich stah.  
Ich bin wie gfange i dem Dorf dri.  
Doch s isch mer glich, well ich gern z Schänis bi.

Wettsch du uf de Rathausplatz,  
fahrsch e Lampä ah, häsch im Auto en Chratz.  
Doch de Andi, wo dett wohnt, chas positiv gseh:  
Idä Stubä brucht er jetzt e kei Lampä meh.

Und chunnsch vo Dorf här, trausch dine Auge nöd.  
Schmier, am gliche Ort de Blitzer? Isch das öd!  
Doch alles halb so schlimm, ich gang eifach z Fuess.  
Au wenn ich zum über d Strass gah drucke mues.

Oh zeig mir de Wäg dur Schänis.  
A jedem Eggä bliib ich stah.  
Ich bin wie gfange i dem Dorf dri.  
Doch s isch mer glich, well ich gern z Schänis bi.



# Tschädrios 2019 s Autoreisli



## Käppelet

Melodie: I bin en Italiano




## Refrain

Oh mia bella bella bella Birra,  
wieso leer ich dich immer id Birrä?  
I dem Zuestand, da gib ich richtig Gas. Hey!  
Käppelet dur Schänis, so machts am meiste Spass.












## Schlafe chan er wie de Brüeder

Ich bi de Büsser Pasci.  
Bi letscht Fasnacht au am Start gsi.  
Nach de Schnitzelbänk im Eiche,  
da schlafi iih bim Seiche.  
Vo de Putzfrau wird ich ufgweckt.  
Bin vo dem Ablick ufgschreckt.  
Ja, wer isch denn sie?  
Mis eigene Mami.

## Hämpe im Gräbli

Ich bi de jüngsti Hämpe.  
Wett eigentlich kei Lämpe.  
Ich bin im Usgang gsi  
und gang jetz is Bettli.  
Die Nacht tuen ich schlafwandlä  
und imne andre Bettli landä.  
Ja, wo gang ich denn hii?  
Zu de Elt'ra is Gräbli.

## Diebstahl im Schlipf

Ich bin es Linthbiitsch-Mitglied,  
normalerwis kein Störfried.  
Nach de Lintbiitsch wett ich hei.  
Gseh no es Velo, ganz ellei.  
Das hät öpper da gla!  
Drum han ichs uf Schänis mitgnah.  
De Bsitzer finds furchtbar:  
Er wär no ade Bar.

## Heilaufe isch blöd

Mir sind de Patrick und de Lukas.  
In Chaltbrunn händ mir uu Spass.  
Ufem Heiweg wird's üs z blöd,  
well laufe wänd mir nöd.  
Was gsehnd mir imne Garte?  
Als wür er uf üs warte.  
Das isch en Chindergokart!  
Mir chlaueten furd Heifahrt.

## Z viel Promill im TV

Ich bin im TV Schänis.  
Ha gester trunke nämis.  
Bin hüt Morgä scho parat  
für e Motocrossfahrt.  
Bi de Bahn tüends nöd vergässe,  
üsä Alkoholwert z mässe.  
Mir wäret silbä, aber nei,  
fahre dörfet nume zwei.

## Blut ist dicker als Bier

Ich bi de Vater Hämpe.  
Ha mit mim Bierli z kämpfe.  
Ich mag das nüme suufä,  
suscht rüert's mi über de Huufä.  
Ich bi de Junior Hämmerli.  
Lauf nichts ahnend in Bäre dri.  
Gseh scho min Vater winkä:  
Ich sell sis Bier ustrinkä.

## Morgenstund hat Bier im Mund

Mir sind zwei Schänner Lappi.  
Nach em Rattäfäscht in Rappi  
wänd mir eifach nöd hei.  
Is Fedrihüttli gönd mir zwei.  
Mir heisset Marcel und Bert.  
Es Bierli isch üs viel Wert.  
Träged drum en Harass ue,  
dobe gsehmer: Da isch zue.

## MacGoiver

Ich bin e jungi Schännerin.  
Gang is Gschäft, au wenn ich verkatret bin.  
Sitz im Zug und s isch mer schlächt,  
ich mues chotzä, aber ächt!  
Doch keis WC isch offä,  
wieso han ich so gsoffä?  
So chörbli i mis Mäppli  
und versteckäs i mim Täschli.

### Mitwirkende

Sepp Duff (Perkussion), Lea Giger (Gesang), Benjamin Mayer (Gitarre), Julia Riget (Gesang), Silvan Rosenast (Euphonium), Michelle Rubin (Trompete), Julia Schirmer (Posaune), Carla Schwitter (Gesang), Priska Schwitter (Posaune), Reto Schwitter (Sousaphon), Lea Steiner (Gesang), Remo Steiner (Trompete), Tanja Steiner (Saxophon), Felicitas Tremp (Gesang) und Livia Tremp (Euphonium)